

LA CARTA DEL APOSTOL SAN PABLO A LOS EFESIOS

¹ Che co jae Pablo. Che co jae Jesucristo jemimondo Tumpa jemimbota rupi. Aicuatía cuae tupapire Efeso pe peico vae pe. Tumpa peñono tee iyeupeguara, jare peyeócuai cavi Cristo Jesús pe. ² ÑandeRu Tumpa jare ñandeYa Jesucristo to mee peve ipiacavi jare ipiacatu.

Tumpa ñanemovendise Cristo rupi

³ Ñamboete Tumpa. Jae co ñandeYa Jesucristo Tu. Tumpa omee ñandeve jeta mbaembae icavi vae ara pegua Espíritu Santo rupi, Cristo re yarovia rambue. ⁴ Echa ndei ivi oyeapo mbove, Tumpa ñandeparavo, ñande ñai vaera Cristo imbaera. Cu ae oyapo, ñaneñono tee vaera iyeupeguara, jare ñanembojupi vaera jae jovaque. ⁵ Tumpa ñanderaiu. Jae rambue tenonde yave ñandeparavo yaye apo vaera tai retara Jesucristo rupi. Echa cuae iquírei yae oyapo jae jemimbota rupi. ⁶ Jare cuae oyapo, ñamboete vaera ipiacavi tuicha vae jeco pegua. Tumpa ipiacavi yae ñandeve Tai oaíu yae vae rupi. ⁷ Jesucristo ñanderepi ma. Echa omano ñanderé. Jae rambue Tumpa iñiro ñandeve ñanembayo reta re. Echa jae ipiacavi tuicha yae co. ⁸ Tumpa iyaracuaa catu jare opaete oicuaa. Jae rambue ipiacavi yae ñandeve. ⁹ Tenonde yave mbaeti oicua uca iquírei oyapo vae. Ereí añave oicua uca ñandeve iquírei oyapo vae. Cu ae oyapo jemimbota ae rupi.

10 Cuae co Tumpa iquirei oyapo vae: Omboatita opaete mbaembae oyeapogüe vae, Cristo oi vaera iYara - opaete mbaembae ara pe ñogüinoi vae, jare opaete mbaembae ivi pe ñogüinoi vae. Cuae Tumpa oyapota ara iyapi yave.

11 Tenonde yave Tumpa ñandeparavo ñanoi vaera jae omeeta ñandeve vae. Jae ñandeparavo, ñande ñai vaera Cristo imbaera. Jare Tumpa cuae oyapo iquirei rambue. Echa jae oyapo opaete mbaembae jae jemimbota rupi. **12** Cuae Tumpa oyapo oñemboeteuca vaera iru vae reta pe ore reta rupi. Echa ore rani rogüirovia Cristo re. **13** Jare pe reta vi perovia Cristo re, peendu yave ñee añete vae. Echa jocuae ñee icavi vae omombeu peve quirai peñemboasauca vaera. Jare perovia Cristo re yave, Tumpa omee peve Espíritu Santo, oicuaucávaera pe reta jae imbae co. Echa Tumpa güirocuavee omee vaera Espíritu Santo. **14** Tumpa omee ñandeve Espíritu Santo, oicuaucávaera ñanoita opaete Tumpa omeeta ñandeve vae. Cuae Tumpa omeeta ñandeve ñanderepi ete yave. Ñande co jae imbae. Jare Tumpa cuae oyapo yave, oñemboeteucata co cuae jeco pegua.

Pablo oyerure Tumpa pe oporogüirovia vae reta re

15 Jae rambue che aicuaa güive quirai pe reta perovia ñandeYa Jesús re, jare quirai peaiu opaete Tumpa oñono tee iyeupeguara vae reta, **16** jecuaeñoi amee yasoropai Tumpa pe peré, jare jecuaeñoi chemaendúa peré, ayerure Tumpa pe yave. **17** Tumpa tomee peve aracuaa Espíritu Santo rupi, jare toicuaucápeve mbaembae, peicuaa

cavi vaera Tumpa regua. Tumpa co jae ñandeYa Jesucristo oicuaucá ñandeve vae. Jae co ñandeRu oñemboeteuca vae. ¹⁸ Tumpa tomee peve aracuua, peicuua vaera quirai pepuere pearo peyerovia reve. Echa jae preparavo cuaera. Tumpa toicuaucá vi peve quirai oñemboeteuca yaeta opaete vae pe omeeta ñandeve vae jeco pegua. Echa jae ñaneñono tee iyeupeguara. ¹⁹ Tumpa toicuaucá vi peve quirai tuicha yae imbaepuere ñanembori vaera. Echa ñande yarovia Cristo re. Tumpa oicuaucá ma tuicha yae co cuae imbaepuere. ²⁰ Echa cuae imbaepuere rupi Tumpa omoingove ye Cristo güeru omanogüe vae reta ipite güi, jare omee chupe oguapi vaera iyacatu coti ara pe. ²¹ Cristo imbaepuere tuicha yae opaete mburuvicha reta ara pegua jare ivi pegua jare oipotagüe mbaepuere güinoi vae imbaepuere güi. Cristo imbaepuere tuicha yae opaete cuae ara reta pe mbaepuere güinoi vae reta jare opaete ara reta outa vae pe mbaepuere güinoita vae reta imbaepuere güi. ²² Echa Tumpa omee Cristo pe oico vaera opaete vae iYara. Omee vi chupe oico vaera oporogüirovia vae reta iYara. ²³ Echa oporogüirovia vae reta Cristo jete co. Jae rambue oporogüirovia vae reta jare Cristo meteiño co. Jare Tumpa omee opaete mbaembae Cristo pe.

2

Tumpa ñanemboasa ipiacavi jeco pegua

¹ Jare Tumpa omee ma peve tecove ipiau vae. Echa tenonde yave mbaeti penoi tecove ipiau vae pereco icavi mbae vae jare pembaeyoa reta

jeco pegua. ² Jare jocuae jeco pegua jecuaeño peyapose icavi mbae vae oporogüirovia mbae vae reta jeco rami. Echa jocorai oipota peyapo vaera jocuae mburuvicha icavi mbae vae mbaeti ñandepuere yaecha vae - jae co jocuae aña guasu oporogüirovia mbae vae reta ipia pe oparavíqui oi vae. Jocorai oparavíqui, agüiye vaera jae reta oyapo Tumpa jeigüe. ³ Tenonde yave opaete ñande vi yaico ñaneremimbota reño jae reta rami. Echa yaicose ñanderete jare ñaneñemongueta oipota vae re. Jae rambue Tumpa pochise ñandeve, opaete iru vae reta pe pochi rami. Echa ñande vi ivi pegua reta co jae reta rami. ⁴ Erei Tumpa ñandeparareco yae, jare ñanderaiu yae. ⁵ Jae rambue omee ñandeve tecove opa mbae vae yaico vaera Cristo ndive, yepe tei tenonde yave mbaeti ñanoi tecove opa mbae vae ñanembayo reta jeco pegua. Tumpa ñanemboasa ipiacavi jeco pegua. ⁶ Tumpa omoingove ye Cristo Jesús güeru omanogüe vae reta ipite güi. Jae ramíño vi omee ñandeve tecove opa mbae vae Cristo Jesús ndive, jare ñandeapo meteiño Cristo Jesús ndive. ⁷ Cuae oyapo, oicauaca vaera ara reta outa vae pe quirai tuicha yae co ipiacavi. Cuae ipiacavi oicauaca ma ñandeve Cristo Jesús rupi. ⁸ Echa Tumpa ñanemboasa ipiacavi jeco pegua, yaporogüirovia rambue. Ñande mbaeti etei ñamongana ñemboasa. Jae co Tumpa ñanembopota pipe vae. ⁹ Mbaeti quia ipuere omongana ñemboasa oipotagüe mbaravíqui rupi, agüiye vaera quia ipuere jei: “Cheparavíqui rupi co amongana ñemboasa”. ¹⁰ Echa Tumpa ñandeapo. Jare ñandeapo ma metei ramíño Cristo

Jesús ndive, ñande yayapo vaera icavi vae. Echa tenonde yave Tumpa iquirei jecuaeño yayapo vaera icavi vae.

Cristo ñanembopiacatu Tumpa ndive

¹¹ Jae rambue pemaendúa cuae re: Pe reta co jae judío mbae vae reta. Jare jocuae oñemocircuncidauga jee vae reta - jae reta oñemocircuncidauga co jete pe - jae reta pembojee oñemocircuncidauga mbae vae reta. ¹² Jae rambue jocuae ara reta pe Cristo mbaeti co mbae peve. Echa pe reta mbaeti etei co Israel pegua reta, jare Tumpa güirocuavee Israel pegua reta pe vae mbaeti co pembaera. Jae rambue mbaeti co mbae pearo vaera peyerovia reve. Echa peicose cuae iví pe Tumpa peicuaa mbae reve. ¹³ Tenonde yave pe reta mombirí peico Tumpa güi. Ereí añave peyeapo metei ramiño Cristo Jesús ndive, jare coiño ma co peico Tumpa güi Cristo imano jeco pegua. ¹⁴ Echa Cristo co jae mbíacatu omee ñandeve vae. Jae oyapo metei ramiño judío reta jare judío mbae vae reta. Tenonde yave judío reta jare judío mbae vae reta oyovaicho oyoupi. Oñemboyao reta oyougüi. Ereí Cristo omboai ma ñemboyaoa. ¹⁵ Echa Cristo omano yave, omboai mborooócuai. Echa mborooócuai omombeu judío reta pe mbae oyapo vaera. Jae rambue Cristo omboai mborooócuai, oyapo vaera mócoi reve metei ramiño jae ndive. Jocorai omee mbíacatu. ¹⁶ Jare cuae oyapo, ombopíacatu vaera Tumpa ndive mócoi reve metei ramiño imano jeco pegua. Echa imano jeco pegua mbaeti ma oyovaicho oyoupi.

¹⁷ Jayave ou omombeu mbiacatu regua pe reta tenonde yave mombirí peico chugüi vae pe jare ore reta tenonde yave coiño roico chugüi vae pe. ¹⁸ Echa jae jeco pegua mócoi reve ñandepuere yaya ñandeRu re Espíritu Santo rupi. Echa Espíritu Santo meteiño co. ¹⁹ Jae rambue pe reta mbaeti ma co ambué tenta pegua reta rami. Pe reta co jae oñeñono tee Tumpa peguara vae reta jentaigua reta. Pe reta co jae Tumpa jentara reta. ²⁰ Ñamojaanga metei o. Temimondo reta jare Tumpa iñee omombeu vae reta o iguapiara oñono vae reta rami co, jare pe reta co jae o rami. Jesucristo etei co jae ita oñeñono tenonde ora vae rami. ²¹ Opaete o oyeapocavi oi ita oñeñono tenonde ora vae ndive, jare oyeapo oi metei o oñeñono tee ñandeYa peguara vae. ²² Pe reta vi metei ramíño co ñandeYa ndive. Jae rambue pe reta vi co jocuae o rami. Echa Tumpa oico jocuae o pe Espíritu Santo rupi.

3

Tumpa oicauaca Pablo pe tenonde yave mbaeti oyecuaa vae

¹ Jae rambue che etei ayerure Tumpa pe peré. Che co jae metei tembipií pereco pegua, Cristo Jesús pe ayeócuai rambue - pe reta co jae judío mbae vae reta. ² Peicuaa ma co aipo quirai Tumpa oicauaca cheve ñee Tumpa ipiacavi regua, che aicauaca-yoapi ye vaera peve. Corai ayeócuai ai Tumpa pe. ³ Peicuaa ma co aipo quirai jae etei oicauaca cheve jocuae tenonde yave mbaeti oyecuaa vae. Echa cuae regua aicuatía ma peve

mboví ñee pe. ⁴ Pemongueta yave, peicuaa cavita co quirai che aicuaa jocuae Cristo regua tenonde yave mbaeti oyecuaa vae. ⁵ Tenonde yave cuae mbaeti etei oyecuaa íví pegua reta pe. Ereí añave Tumpa oicuaucha temimondo oñono tee iye-upeguara vae reta pe jare iñee omombeu vae reta pe. Jae oicuaucha chupe reta Espíritu Santo rupi. ⁶ Jae co cuae: Oendu yave ñee icavi vae, jare güirovia yave Cristo Jesús re, judío mbae vae oporogüirovia vae reta güinoita imbaera judío oporogüirovia vae reta ndive, jare mócoi reve oyeapota metei ramíño - metei jete ramí - jare mócoi reve güinoita Tumpa güirocuavee vae. ⁷ Che ayeócuai Tumpa pe. Ipiacavi jeco pegua Tumpa omee cheve jae imbaepuere rupi che amombeu vaera ñee icavi vae. ⁸ Yepe tei che co jae oñeñono tee Tumpa peguara vae reta jaicuega ete, ereí Tumpa cuae omee cheve ipiacavi jeco pegua, che amombeu vaera judío mbae vae reta pe quirai yaicocatu yae co Tumpa cotí, Cristo re yarovia yave. Echa mbaeti quia ipuere oicuaa cuae regua íñemongueta ae rupiño. ⁹ Jare Tumpa omee cheve aicuaucha vaera opaete vae pe quirai Tumpa omee cheve ayeócuai vaera chupe cuae tenonde yave mbaeti oyecuaa vae re. Echa tenonde yave Tumpa mbaeti etei oicuaucha quia pe cuae. Tumpa co jae opaete mbaembae iyapoa. ¹⁰ Cuae Tumpa omee cheve, mburuvicha reta jare mbaepuere güinoi vae ara pe ñogüinoi vae reta oicuaa vaera quirai Tumpa iyaracuaa catu co. Cuae oicuaa retata oporogüirovia vae reta rupi. ¹¹ Echa corai Tumpa jecuaeño iquireí oyapo ñandeYa Jesucristo rupi.

¹² Mbaeti ma yaquiyé Tumpa güi. Echa yarovia ma Cristo re rambue, ñandepuere yaya Tumpa re Cristo rupi yaquiyé mbae reve. ¹³ Jae rambue agüiyé pepiatiti aiporara pereco pegua vae re. Pepuere pemboete Tumpa cuae re.

Cristo iporoaiu

¹⁴ Jae rambue che ayeatica ñandeYa Jesucristo Tu jóvai. ¹⁵ Opaete jentara ara pe ñögüinói vae reta jare jentara iví pe ñögüinói vae reta güinói jee chugüi. ¹⁶ Ayerure Tumpa pe omee vaera peve mbaepuere. Echa jae imbaepuere jeco pegua oñemboeteuca yae. Jare cuae mbaepuere rupi Tumpa iEspíritu tapemomirata pepia pe. ¹⁷ Toyecuuaa cavi quirai Cristo oico pepia pe peporogüirovia jeco pegua. Tumpa tapemomirata jare tapemoatangatu iporoaiu pe, ¹⁸ pepuere vaera peicuuaa cavi opaete oñeñono tee Tumpa peguara vae reta ndive quirai tuicha yae ete co Cristo iporoaiu, ¹⁹ jare peicuuaa vaera Cristo iporoaiu, yepe tei mbaeti quia ipuere oicuuaa cavi ete opaete jocuae mboroaíu. Pepia titinie Tumpa pe.

²⁰ Jare añave ñamboete Tumpa. Echa jae ipuere yae opaete ñande yayerure chupe jese vae güi, jare opaete ñañemongueta jese vae güi. Jeta yae oyapota ñandeve imbaepuere ñandepia pe oparaviquí vae rupi. ²¹ Tumpa toñemboeteuca opaete vae pe oporogüirovia vae reta rupi jare Cristo Jesús rupi jecuaecuae aveiño. Amén.

4

Metei ramiño Espíritu Santo rupi

¹ Che co jae metei tembipi, ñandeYa pe ayeócuai rambue. Che pomoñera jecuaeño peico cavi vaera, iru vae reta oicuaa vaera Tumpa peparavo co. ² Peñemomichi oyocoti. Agüiye pepochi oyoupe. Pepiaguasu oyoupe. Peyoaiu rambue, agüiye peñieengata oyoupe. ³ Peñemoatangatu peico vaera metei ramíño pepiacatu reve Espíritu Santo rupi. ⁴ Cristo jete pegua reta meteiño co, jare Espíritu Santo meteiño co. Jae ramíño vi Tumpa peparavo, pearo vaera peyerovia reve metei ramíño. ⁵ Oime vi meteiño ñandeYa, jare opaete yarovia ñandeYa re, jare opaete ñañembobautiza Espíritu Santo pe. ⁶ Tumpa vi meteiño co. Jae co ñandeRu. Jae co ñandeYa. Jae oparavíqui opaete ñande rupi. Jae oico ñandepia pe.

⁷ Erei Cristo omee ñaneavo pe ipiacavi, ñandepuere vaera yayapo mbaravíqui Cristo oipota yayapo vaera vae. ⁸ Echa Tumpa iñee pe oyecuatía oi corai:

Oyeupi ojo ara pe yave, güiraja tembipi reta, jare omee mbota reta ivi pegua reta pe. Jocorai oyecuatía oi.

⁹ Taparandu peve, ¿mbae pa oipota jei cuae oyeupi ojo ara pe jei vae? Oipota jei ogüeyi rani vi co ivi igüi pe etei. ¹⁰ Jocuae ogüeyi vae co jae oyeupi ojo ivate yae opaete ara reta güi vae etei. Jocorai oyeupi, oyeapo vaera opaete mbaembae iYara. ¹¹ Jare Cristo etei omee amogüe vae pe temimondo retara yogüireco vaera. Jare omee amogüe vae pe Tumpa iñee omombeu vaera. Omee vi amogüe vae pe omombeu vaera ñee icavi vae. Omee vi iru vae reta pe oñangareco vaera oporogüirovia vae reta re, jare iru vae reta pe omboe vaera oporogüirovia

vae reta. ¹² Cuae Cristo oyapo, oñeñono tee Tumpa peguara vae reta ipirata vaera iporogüirovia re, jae reta ipuere vaera oparavíqui Tumpa pe, Cristo jetera oyeapo vaera. ¹³ Cristo oipota yayeapo vaera metei ramiño ñandeporogüirovia rupi, yaicuaa cavi vaera jae co Tumpa Tai. Oipota yayeapo vaera metei cuimbae ipirata vae rami. Jare jocorai yayeapota co, ñandepia tinie oi Cristo pe yave. ¹⁴ Cristo mbaeti oipota yaico vaera michia reta rami. Echa michia reta mbaeti oicuaa mbae ra güirovia vaera. Echa metei ara ipuere güirovia metei moromboe, jare iru ara ipuere güirovia iru moromboe. Echa moromboe mbaeti añete vae re oporomboe vae reta ipoqui yae co oporombotaví vaera. ¹⁵ Erei ñande jecuaeño yae añete vae yayoaiu reve. Jocorai yave, yaicota ocuacuaagüe reta rami, Cristo oipota rami. Echa jae co oporogüirovia vae reta iñaca. ¹⁶ Cristo jare oporogüirovia vae reta metei cuimbae rami co. Echa opaete cuimbae jete jare opaete iyoapiapía oparavíqui metei ramiño, icavi oi vaera cuimbae. Jae ramiño vi opaete oporogüirovia vae reta oparavíqui metei ramiño oyoaiu reve, Cristo jetera oyeapocavi vaera.

Tecove ipiau vae

¹⁷ Jae rambue che amombeu peve ñandeYa jee re cuae: Agüiye mo peico oporogüirovia mbae vae reta yogüireco rami. Echa jae reta yogüireco oñemongueta cavi mbae reve. ¹⁸ Echa iñemongueta oñemopitumimbi ma. Mbaeti güinoi tecove Tumpa omee vae. Echa mbaeti oicuaa

Tumpa regua, ipiatanta rambue. ¹⁹ Jecuaeño imboquere, jare mbaeti etei imara. Echa oipota yae reta oyapo vaera opaño mbae pochii vae. ²⁰ Erei mbaeti co jocorai Cristo pemboe. ²¹ Peendu ma co aipo chupe, jare peñemboe ma co aipo añete vae re. Echa añete vae co jae Jesú. ²² Jae rambue agüiye mo peico peicose rami. Pemombo peyeugüi pereco indechigüe pochii vae. Echa peicose peremimbota reño, jare jocorai peñembotavi. ²³ Toñembopíau peñemongueta. ²⁴ Peipií teco ipíau vae. Echa teco ipíau vae jupi co, jare mbaeti etei mbaeyoa oyapouca peve. Cuae teco ipíau vae icavi co Tumpa pe.

²⁵ Jae rambue agüiye mo peapu oyoupe. Opaete pere añete vae perapicha pe. Echa opaete ñande metei ramíño co.

²⁶ Pepochi yave, agüiye peyoa. Agüiye pepitu pearasi reve.

²⁷ Agüiye pemaenoaña guasu re mbaepuere güinoi vaera peré.

²⁸ Imondase vae agüiye ye mo timonda. Erei toyapo ipo pe mbaravíqui icavi vae, oime vaera güinoi mbae omee vaera paravete vae pe.

²⁹ Agüiye pemoe ñee pochii vae. Erei pemoe ñee icavi vae, pembori vaera iru vae reta. Echa jocorai Tumpa ipuere ombori oyeadisaca peré vae reta. ³⁰ Jare agüiye pembopiatiti Tumpa iEspíritu Santo. Echa Tumpa omee ma peve Espíritu Santo, oicauca vaera pe reta jae imbae co. Jare Espíritu Santo oicota pe reta ndive, Tumpa perepi ete regua.

³¹ Agüiye peñoangao. Agüiye pepochi oyoupe. Agüiye pearasi oyoupe. Agüiye peñeengata oy-oupe. Agüiye pere icavi mbae vae oyoupe. Agüiye peyapo icavi mbae vae oyoupe. ³² Erei pepiacavi oyoupe. Peyoaiu. Peiro oyoupe. Echa Tumpa iñiro ma peve Cristo jeco pegua.

5

Yaico Tumpa jemimbota re

¹ Jecuaeño peico Tumpa jemimbota re. Echa Tumpa co jae ñandereRu jare jae ñanderaiu. ² Jae rambue peico peyoaiu reve, Cristo ñanderaiu rami. Echa Cristo oñemoeterenga omano vaera, metei maemimba oyeyucagüe Tumpa pe oñererocuavee vae rami. Jare cuae oyapo omboai vaera ñanembaeoya reta. Cuae ombooyerovia Tumpa, mbae ipiche cavi vae oporombooyerovia rami.

³ Erei agüiye etei pemari oyoupe aguasa re jare opaete mbae pochii vae re, jare agüiye peipota iru vae reta imaembae. Echa Tumpa peñono tee ma iyeupeguara. ⁴ Jare agüiye vi pemari oyoupe imboquere vae reta imiari rami. Agüiye pemari oyoupe iyaracuaa mbae vae reta imiari rami. Agüiye peñurunguiche oyoupe ñee icavi mbae vae pe. Echa mbaeti icavi pemari vaera oyapo jocorai. Erei cuae mbaembae icavi mbae vae jecovia pe pemee yasoropai Tumpa pe. ⁵ Echa pe reta peicuaa cuae: Aguasa oyapo vae reta, jare opaete mbae pochii vae oyapo vae reta, jare iru vae reta imbaembae oipota vae reta - echa oipota yae iru vae reta imbaembae Tumpa güi - ngaraa yogüireco Cristo jare Tumpa iporoocuaia pe. ⁶ Agüiye pemaeno quia re

pembotaví vaera cuae re. Echa cuae icavi mbae vae jeco pegua Tumpa oiporaraucata co Tumpa jeigüe mbaeti oyapo vae reta pe. ⁷ Jae rambue agüiye peico jae reta yogüireco rami.

⁸ Echa tenonde yave pe reta peico yogüireco pitumimbi pe vae reta rami. Erei añave peico tembipe ñandeYa omee peve vae pe. Jecuaeño peico yogüireco tembipe pe vae reta rami. ⁹ Echa tembipe pe yogüireco vae reta ipiacavi, jare jupi vae oyapo, jare jei añete vae. ¹⁰ Jecuaeño peipota peicuaa ñandeYa oipota peyapo vaera vae. ¹¹ Agüiye etei peñemoiru pitumimbi pe yogüireco vae reta ndive. Echa jocuae oyapo reta vae mbaeti icavi Tumpa pe. Erei peicuaucha icavi mbae vae co jocuae oyapo reta vae. ¹² Echa metei ñemomarai co ñanemiari vaera jocuae oyapo viari reta vae re. ¹³ Tembipe oi yave, opaete oyecuaa cavi, jare ñandepuere yaicuaucha icavi mbae vae co opaete jocuae mbaembae. Echa jocuae oyapo opaete oyecuaa cavi vaera vae tembipe co. ¹⁴ Jae rambue Tumpa jei oque vae pe corai:

Eicove mo.

Eicove ye metei ou omanogüe vae reta ipite güi vae rami.

Cristo tomee ndeve tembipe.

Jocorai jei.

¹⁵ Jae rambue peñemoatangatu peico cavi vaera. Agüiye peico iyaracuaa mbae vae reta yogüireco rami. Peico iyaracuaa catu vae reta yogüireco rami. ¹⁶ Jecuaeño peyapo icavi vae. Echa jeta vae oyapo icavi mbae vae. ¹⁷ Jae rambue agüiye pearacuaa mbae. Erei peicuaa cavi ñandeYa

jemimbota. ¹⁸ Jare agüiye pesavaipo. Echa osavaipo vae reta oyapo jeta mbae icavi mbae vae. Erei pemaenõ Espíritu Santo re omotinie vaera pepia. ¹⁹ Peicauaca quirai peyerovia yae canta reta ñamboete Tumpa pipe vae pe. Pecanta jare pemboete ñandeYa pepia pe. ²⁰ Jecuaenõ pemee yasoropai opaete mbae re ñandeRu Tumpa pe ñandeYa Jesucristo jee re.

Yayeócuai oyoupe

²¹ Peyeócuai oyoupe, pemboete Tumpa rambue.

²² Cuña reta toyeócuai ime ae pe, oyeócuai ñandeYa pe rami. ²³ Echa cuimbae oyócuai jembireco, ñaneaca oyócuai ñanderete rami. Jae ramiño vi Cristo co jae oporogüirovia vae reta iñaca. Jare oporogüirovia vae reta co jae Cristo jete, jare Cristo co jae oporogüirovia vae reta omboasa vae. ²⁴ Jare oporogüirovia vae reta oyeócuai Cristo pe. Jae rambue jae ramiño vi cuña reta toyeócuai ime pe opaete mbae re.

²⁵ Cuimbae reta toaiu jembireco, Cristo oaiu oporogüirovia vae reta rami. Echa jae oñemoeterenga omano vaera jese reta, ²⁶ oñono tee vaera iyeupeguara, jare oitio vaera. Echa iñee ñandetio, mbae yayoe i pe rami. ²⁷ Jocorai Cristo oyapo, oporogüirovia vae reta oñemboeteuca vaera jae jóvai ñogüinoi yave. Ngaraa güinoi mbae iquia vae jare mbae oñemopochii vae. Ngaraa etei güinoi cuae nunga mbaembiae. Echa Cristo oñemoeterenga omano vaera, oporogüirovia vae reta oñeñono tee vaera chupeguara, jare icavi yae ñogüinoi vaera. ²⁸ Cuimbae reta toaiu jembireco, jete ae oaiu rami. Cuimbae jare jembireco

meteiño co. Jae rambue jocuae oaiu jembireco vae jae ae co oyeäu. ²⁹ Echa mbaeti etei quia omotarei jete ae. Opaete vae omongaru jete ae, jare oñangareco jese. Jae ramiño vi Cristo oñangareco oporogüirovia vae reta re. ³⁰ Echa ñande co jae Cristo jete pegua reta. Ñande co jae Cristo isoo jare icagüe pegua reta. ³¹ Cuae jeco pegua metei cuimbae toeya tu jare ichi, jare toñemoiru jembireco ndive, mócoi reve oyeapo vaera metei ramiño. ³² Mbaeti etei ñandepuere yaicuaa cavi cuae regua. Erei chemiari ai peve Cristo jare oporogüirovia vae reta re. ³³ Erei metei ñavo toaieu jembireco, jae ae oyeäu rami. Jare cuña tomboete ime.

6

¹ Cunumi reta jare cuñatai reta toyapo tu jare ichi jeigüe, ñandeYa re güirovia rambue. Echa cuae jipi co. ² Tumpa omombeu Moisés rupi mborooócuai reta. Jare mborooócuai morogüirocuavee güinoi vae reta itenondegua vae co cuae: “Emboete nderu jare ndesi, ³ reico cavi vaera, jare reicopucu vaera ivi pe”.

⁴ Jare tu reta agüiye tomboarasi imichia reta. Erei tombocuacuaa cavi. Tomboe jipi vae re, jare tomboaracuaa, ñandeYa oipota rami.

⁵ Oyeócuai vae reta toyapo iya ivi pegua jeigüe oipoiu reve jare omboete reve. Ipiáquierei reve toyeócuai iya pe. Toyeócuai chupe, Cristo pe oyeócuai rami. ⁶ Agüiye toyeócuai cavi iya pe jae omae oi jese yaveño, omboyerovia vaeraño. Toyeócuai chupe, Cristo pe oyeócuai rambue, jare Tumpa jemimbota ipiáquierei reve oyapo rambue.

⁷ Toyeócuai chupe, oipota yae rambue. Toyeócuai chupe, Cristo pe oyeócuai rami. Echa mbaeti cuimbæ peñ oyeócuai. ⁸ Toicuaa cuae: Oipotagüe vae - metei oyeócuai vae ani metei mbaeti oyeócuai vae - mbae icavi vae oyapo yave, ñandeYa oyapota vi chupe mbae icavi vae.

⁹ Jare oporoócuai vae reta toyapo icavi vae jembiócuai reta coti. Agüiye jecuaeño tomomburu. Echa toicuaa jae reta vi güinoi co iYa ara pe. Jare ñandeYa ara pe oi vae mbaeti oaíu metei vaeño iru vae güi.

Mbaepuere ñandeYa ipuere omee ñandeve vae

¹⁰ Taicue rupi ete tae peve, cherivi reta, cuae: Peñemombae jocuae mbaepuere ñandeYa ipuere omee ñandeve vae re. ¹¹ Peiporu opaete Tumpa ipuere omee ñandeve vae, pepuere vaera peyeepi opaete mbae icavi mbae vae aña guasu oipota oyapo peve vae güi. ¹² Echa mbaeti ñañoraro ñai ivi pegua reta ndive. Ñañoraro ñai espíritu icavi mbae vae ara pe ñogüinoi vae reta ndive. Jae reta co ivi pegua pitumimbi pe yogüireco vae reta iya reta, jare mbaepuere güinoi reta oporoócuai vaera. ¹³ Jae rambue peiporu opaete Tumpa ipuere omee ñandeve vae, agüiye vaera peñemaeño icavi mbae vae oñoraro pe ndive vae reta pe, jare peñoraro güire, jecuaeño pepirata vaera. ¹⁴ Jae rambue peñemomirata. Ñamojaanga sundaro. Sundaro güinoi mbaembæ ipuere vaera oñoraro cavi. Jae ramiño vi Tumpa omee ñandeve vae ñanembopuere, ñandepuere vaera ñañoraro cavi. Echa pere yave añete vae, icavita peve sundaro icúa iyocuaa icavi sundaro pe rami. Jare peyapo

yave jupi vae, icavita peve sundaro icamisa jiero pegua icavi sundaro pe rami. ¹⁵ Jare peipota yave pemombeu iru vae reta pe ñee icavi vae mbiacatu regua, icavita peve sundaro ipiapaa icavi sundaro pe rami. ¹⁶ Jare mborogüirovia jecuaeño penoi yave, icavita peve metei yeopiaca icavi sundaro pe rami. Echa sundaro ipuere oyopia yeopiaca pe opaete ui jovaicho reta oyapi pípe vae. Jae ramíño vi mborogüirovia jecuaeño penoi yave, ngaraa peyapo icavi mbae vae, yepe tei aña guasu oipota yae peyapo vaera. ¹⁷ Jare jecuaeño pemaendúa yave quirai Tumpa pemboasa ma co, icavita peve aca regua jiero pegua icavi sundaro pe rami. Jare peiporu yave Tumpa iñee Espíritu Santo imbaepuere rupi, icavita peve metei quisepucu icavi sundaro pe rami. ¹⁸ Jecuaeño peyerure Tumpa pe mbaembiae re. Jecuaeño peyerure Espíritu Santo rupi. Jecuaeño peñemoatangatu, agüiye vaera pecuérai. Jecuaeño peyerure Tumpa pe opaete oñeñono tee Tumpa peguara vae reta re. ¹⁹ Peyerure yae cheré, Tumpa omee vaera cheve chemiari vaera aquiyé mbae reve, aicuaucá vaera ñee icavi vae tenonde yave mbaeti oyecuaa vae. ²⁰ Echa Tumpa chembou amombeu vaera cuae ñee, jare cuae ñee jeco pegua añaapiti ai. Peyerure cheré, amombeu vaera aquiyé mbae reve. Echa jocorai icavi co amombeu vaera.

²¹ Tíquico omombeuta peve opaete mbaembiae, peicuaa vaera cheregua jare ayapo ai vae regua. Tíquico co jae ñanderivi. Aaiú co. Jae oyeócuai cavi ñandeYa pe. ²² Jae rambue amondo pepíri, peicuaa vaera oreregua, jare jae pembopiacatu vaera.

23 ÑandeRu Tumpa jare ñandeYa Jesucristo tomee peve, cherivi reta, mbiacatu jare mboroaíu jare mborogüirovia. **24** Tumpa tomee ipiacavi opaete mboroaíu opa mbae vae ñandeYa Jesucristo cotí güínoi vae reta pe. Amén.

**Nuevo Testamento Guaraní Pe
New Testament in Guaraní, Eastern Bolivian
(BL:gui:Guaraní, Eastern Bolivian)**

copyright © 2012 Wycliffe Bible Translators, Inc.

Language: Guaraní, Eastern Bolivian

Translation by: Wycliffe Bible Translators, Inc.

Guaraní, Eastern Bolivian [gui], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Eastern Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

xx

2014-04-25

**PDF generated using Haiola and XeLaTeX on 11 Nov 2022 from source files
dated 29 Jan 2022
577acc2d-2f51-5700-8a70-613f34a2faba**